



Nuuk 14. marts 2012

Inatsisartut suleriaasianni § 37 imm. 1 naapertorlugu Naalakkersuisunut apeqqutit imaattut matumuuna saqqummiuppakka:

UKA 2010/68-imut tunngatillugu apeqqutigisimasannut Naalakkersuisunit akissutigineqartumut ilassutitut apeqquteqaqqippunga.

AFS imaluunniit EF aqutigalugit, inuusuttut annerusumik tuluit oqaasiinik ilinniariartortartut ullummikkornit amerlanerusut aallartalernissaat anguniarlugu suliniutinik sunik aallartitsiniarpisi?

Malik Berthelsen, Siumut

Tunngavilersuut:

24.januar 2012 (sagsnr.2012-060406) apeqqutinut akissutigisarsi, Inatsisartut tamarmiullutik Naalakkersuisunut suliakkiutaannut UKA 2010/68-imut napertuutinngimmat apeqquteqaqqippunga.

Inatsisartut UKA 2010/68-imi Naalakkersuisunut pisussaaffiliipput, inuusuttut ullumikkut nunanut allanut annerusumik tuluit oqaasiinik ilinniariartortut amerlisarneqarnissaannik suliniutinik Naalakkersuisut aallartitsissasut.

Taamatuttaarlu Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap, Naalakkersuisunut **sakkortuumik** kaammattuutigivaa, siunnersuutip piviusunngortinnissaanut, efterskolertunut tapiisarnertuulli tuluit oqaasiinik nunanut allanut atuariartortartut tapiiffigineqartalernissaannik periarfissanik misissueqqullugit.

Kissaatiginngilara AFS imaluunniit EF aqutigalugu atuariartortartut allaninngaanniit aningaasanik taperneqartarnerisa nassuiaatigineqaqqinnissaat. Siunnersuummummi UKA 2010/68 itigartitsinissinnut allaninngaanniit tapiisarnerit tunngavilersuutigigaluarisi, Inatsisartulli allatut isumaqarlutik siunnersuut akuersissutiginikuuat suliakkiutigalugu.

Tuluit oqaasiisa qanoq pingaaruteqartigineri tamatta ilisimareeratsigu, itisileqqinngakkaluarlugit oqaatigiinnassavara, meeqqat atuarianni tuluit oqaasiinik misilitsittut (2009) 30%-iisa karakteri 5-imik taassuminngaluunniit appasinnerusumik karaktereqarnerisa uppernarsarpaat, siunnersuutip piviusunngortinnissaata qanoq pingaaruteqartiginera.